

# “shàmû rang”

A Collection of  
Marriage Songs and Leelas  
by

**Smt. Shamrani Raina**



(Internet Edition: M.K.Raina)  
05 April 2007





**Smt. Shamrani Raina**

(1933-2007)

**“Maa ... You will always live in our hearts”**

– Raina Parivar, Vasai, Mumbai -

## सूची

१. महा गॅनीशस कुन
२. ब्यल तय मादल
३. ही सदा शीवु
४. गन्योमुत छुम मनस
५. गाह च्चु हरम्वख
६. वॅकम्य साँ नीनवु कांगुर म्यॉन्य
७. हयो शाम लालो
८. वाद् कॅरिथुय
९. कर साँ म्योन न्याय अंदे
१०. हा जानि अँज़ीज़ो
११. द्रायि फुलयाह
१२. च्चु माता कासतम मे गम
१३. जय दुर्गे
१४. सुदामु
१५. वॅकम्यू नियि प्रॉटिथ

१६. जगत अम्बा
१७. बालि छुमय रुमु रुमय
१८. प्रबात आव पोशि नूलो
१९. अज हय यियि शंकर
२०. चित्रगुप्त दर्म राजु छुय नमसकार
२१. सुमरन पनुन्य दिघाँनम
२२. अँछ दरु लजम
२३. शर हय जिगरस सोरुय द्रामय
२४. संतुश्ट रोजतम
२५. माँज वनतय पाया म्योन
२६. ग्वडन्य गनपत जीयस कुन कर नमसकार
२७. कूत तुलु व्वन्य अजाब माँजी
२८. चानि डेडि तल बु आस
२९. चोन बजराह
३०. हाँरिये थावख ना कन तु लोलो
३१. माँज शारिकाँय गोश थवतम
३२. स्वख तु सम्पदा

३३. जान वंदुयो यारि जानानो

३४. ॐ श्रीमत ही बवॉनी

३५. माँज लक्ष्मी आयि सोन सालु लोलो

३६. रिंदु पोशि माल



## १. महा गॅनीशस कुन

महा गॅनीशा बोजू ज़ारु पार  
बवसरु तार लोलो  
कासतम मे मोह अंदुकार  
स्वरगस खार लोलो

गॉमुन्न छस गिरिफतार  
समयिकि ज़ालु लोलो  
छुय ना त्रे केंह ति म्योन आर  
बवसरु तार लोलो

गदि प्यठ छुख च़ु बिहिथ  
शूबवुनि चालि लोलो  
थोद क्याह छु चोन दरबार  
बवसरु तार लोलो

नॉल्य छुय म्वख्तय हार  
बेयि स्वनु मालु लोलो  
सनम्वख छुख च़ु साकार  
बवसरु तार लोलो

आदि दीवु सर्व आदार  
यिखना सालु लोलो  
होल छुम कूत काल प्रारु  
बवुसरु तार लोलो

सूर गोम वीरि हकि नार  
व्वन्य हा पान ज़ालु लोलो  
नतु करतु म्योन केंह चारु  
बवुसरु तार लोलो

लँजिमुच्च छम अँशिस दार  
कोताह बु ज़ालु लोलो  
मरु मा मटि छुय त्रे मार  
बवुसरु तार लोलो

उमा छसय बेहाल  
करतु सोन चारु लोलो  
शापन करतम लार  
बवुसरु तार लोलो

मसरुर दर इन्तिज़ार  
रटुहॉथ नालु लोलो  
बँखत्यन बख्यन हार  
बवुसरु तार लोलो

महा गॅनीशा बोजू ज़ारु पार  
बवुसरु तार लोलो  
कासतम मै मोह अंदुकार  
स्वरगस खार लोलो



## २. ब्यल तय मादल

ब्यल तय मादल, व्यनु ग्वलाब पम्पोशि दस्तय  
पूजायि लागव परमु शिवस, शिव नाथस तय

जटाह मुकटाह, प्यठु गंगा वसान छस तय  
दीवी तु दिवता, विष्णु ब्रह्मा छिस दस्त बस्तय  
बक्ती बावुक जयजयकार ऑसिन तस तय  
पूजायि लागव परमु शिवस, शिव नाथस तय

पम्पोशि पादव सुत्य यितम अस्तय अस्तय  
न्नरनन बु वंदय जुव जान ह्यथ वॉलिंज वस तय  
यिनु चानि सुत्यन पोन्थ वुज्यम नाग रादस तय  
पूजायि लागव परमु शिवस, शिव नाथस तय

दया सागरु लोलु वुजयायि कॅरिन मस तय  
हा पोशि मते, होशि डॅल्यमुत्य छि, थव द्यान ह्यस तय  
आसार समसार, छॅलरावान सोर रोजि कस तय  
पूजायि लागव परमु शिवस, शिव नाथस तय

पॉर्य पॉर्य लगय ना, शिव शंकर, शिव नावस तय  
दर्शनु चान्युक छुम यछि लोल सुत्य हावस तय  
टोठतम सदा शिवु, जगतीश्वर छुस बेकस तय  
पूजायि लागव परमु शिवस, शिव नाथस तय

अमरनाथस, नीलकंठस कलु वंदस तय  
दयायि सुत्यन कृष्णस प्यठ आर यीनस तय  
यछि पछि सुत्यन गछु अरपन शिव नावस तय  
पूजायि लागव परमु शिवस, शिव नाथस तय



### ३. ही सदा शीवु

ही सदा शीवु अज़ म्योन, बोज़ख ना च़ु ज़ारु पारय  
कांह ति न्यराश गव ना, चानि येमि दरबारय

चानि नावु मंत्रु सुत्य, पॉपियव ति प्रोव मूक्षदाम  
जन्मन हुंघ पापुन्य बार, नखु वसन मै वारु वारय

शुद्ध बक्ति बाव ह्यथ युस, चाने डेडि तल आव  
गछि तस मन न्यरमल, बेयि गल्यस अहंकारय

ईश्वर माया यि चॉन्य, शूबुन्य तु लूबुन्य छि क्याह  
रंगु रंगु हाव दर्शुन, कुनि प्यठ ना एतिबारय

बॅखुत्य वत्सल छिय वनान, छुख च़ु बख्त्यन दया करान  
दयायि हुंघ बर मुन्नराव, कर पॉपियन वोदारय

न्यथ अच़ू मन मंदरस, तथ अंदर मूरथ च़ु मंग  
तस सुत्य मिलनाव ज़ान, मतु फेरतु आवारय

च़ु ति गछ दिवान कनु डोल, बु ना शेवु त्रावथ नु ज़ांह  
वर मै पादि कमलन तल, तथ ना छुय कांह ति चारय

वुछतखू बाँय तय बंद, तिम ति छा द्वख अँज़रान  
पोज़ हा छुय अख शिव नाव, नतु छा सम्सारय

दिखना मे लोलु वुज़िन्या, प्रेम ज़ल घव मे वुज़िहे  
फवलहँन मे बाव पम्पोश, पूज़ि लागय अंबारय

मे ति दितु ज्ञानुक दीप, मोह अनिगटु गछिहेम दूर  
सूर गछि मे अबिमानस, तु दय मेल्यम यखबारय

★ ★ ★

## ४. गन्योमुत छुम मनस

गन्योमुत छुम मनस चोन बाव  
जगत माता मे दर्शुन हाव  
मे आमुत लोलु बानन छाव  
जगत माता मे दर्शुन हाव

जगत माता च्चु टोठान छख  
बगत संतानुनुय बेशक  
ह्यवान युस लोलु सुत्य चोन नाव  
जगत माता मे दर्शुन हाव

जगत माता मे संतुश्ट रोज़  
वनान ज़ॉरी छसय च्युय बोज़  
पनुन्य दयिगत दयालु मे हाव  
जगत माता मे दर्शुन हाव

तॅमिस क्या गम येमिस यावर  
चु आसख ताज दिथ बरसर  
शतुर सुंद पोरि तस कति दाव  
जगत माता मे दर्शुन हाव

प्रेयम नगरस अंदर चामुत  
बु चाने डेडि तल आमुत  
प्रेयम अमृथ मे दामु दामु चाव  
जगत माता मे दर्शुन हाव

वदान छुस मॉज गनेयम कल  
दॅलिस तल मॉज ह्यतम जल जल  
मे सतुचे प्रेमु न्यँदरे साव  
जगत माता मे दर्शुन हाव

बु छुस ही गँद्य च्ने कित्य सारान  
प्रेमु सान डेडि तल प्रारान  
च्यु प्रेमकि बाव ही गँद्य छाव  
जगत माता मे दर्शुन हाव

बु छुस पज़ि किन्य स्यठाह नादान  
करान छुस पाप छुस अनज़ान  
करुम माफ छुय च्ने माता नाव  
जगत माता मे दर्शुन हाव

ज़गत माता मे संतुष्ट रोज़  
वनान ज़ॉरी छुसय च्युय बोज़  
पनुन्य दयिगत दयालु मे हाव  
जगत माता मे दर्शुन हाव

करान छुस वील तय ज़ॉरी  
थोकुस यूत काल प्रॉर्य प्रॉरी  
मे त्वकुचार गव बुजर व्वन्य आव  
जगत माता मे दर्शुन हाव

छु दासा च़ेय परन प्योमुत  
गँडिथ गुल्य च़ेय शरन आमुत  
छु सुमरान चोन हरदम नाव  
जगत माता मे दर्शुन हाव

★ ★ ★

## ५. गाह च़ु हरम्वख

गाह च़ु हरम्वख गाह च़ु कैलास  
गाह च़ु शुमशानस अंदर  
म्यानि शंकरु कति बु छांडथ  
छुस बु तूफानस अंदर

च़ेय बु ज़ायोस, च़ेय बु रोछिथस  
छुख च़ु म्योनुय मोल मॉज  
क्या खता छुम क्याज़ि त्रोवथस  
यीरु बुतखानस अंदर

जड मै फ्युरनम मोह माये  
तृशनाये वोल मै ज़ाल  
दम शुऑरी छम मै शंकर  
तछनु खुमखानस अंदर

गोट मै गोमुत छुम अँछन दून  
अनि सारे वँन्य दिवान  
पनुनि अनुग्रह कर मै यॉरी  
छुस बु वॉरानस अंदर

गोम ल्वकुचार छल कॅर्य कॅर्य  
दर जवॉनी अंदुकार  
पिलु कोत व्वन्य छम मै थरु थरु  
नठ मै असमानस अंदर

तश्नुलद छुस ज़न्म ज़न्मन  
त्रेशि हँतिसुय छुम प्यपास  
चावतम अज़ म्यूठ दामाह  
पानु मयखानस अंदर

म्यानि शंकरु कति बु छांडथ  
छुस बु तूफानस अंदर

★ ★ ★

## ६. वॅम्य साँ नीनवु कांगुर म्यॉन्य

वॅम्य साँ नीनवु कांगुर म्यॉन्य  
अँनिमुन्न आँसुम च्चारुक्य वॉन्य  
वॅम्य साँ नीनवु कांगुर म्यॉन्य  
तथ मंज़ आँसुम अख नारु दॉन्य  
वॅम्य साँ नीनवु कांगुर म्यॉन्य

कांगुर आँसुम गॅरिथ तु च्चॅरिथ  
हॅरिथ कुस प्यव पोज़ वॅनितव  
निया वावन किनु नियि पॉन्य  
वॅम्य साँ नीनवु कांगुर म्यॉन्य

कांगुर्य म्यॉनी कोत बी गॅयख  
किनु निनु वॉलिस फॅरिस पेयख  
हेरि ब्वनु ज़ॉलिज़्यस दॉन्य दॉन्य  
वॅम्य साँ नीनवु कांगुर म्यॉन्य

तुर मे लॅजिम कांगुर गॅछुम  
यि वॅम्य नीनम यि क्या गव  
छा सु मर्द किनु ख्वडु काँन्य  
वॅम्य साँ नीनवु कांगुर म्यॉन्य

येमी गरु मंजु कोरुहॅम ठठय  
कांगुर्य चूर मरि फ्रट सुत्य  
शहादथ थवस हमसायि चॉन्य  
कॅम्य सॉ नीनवु कांगुर म्यॉन्य

कांगुर्य चूरस गालय बंगय  
नंगय त्रावन लंकन मंज  
कांगुरि चूरो द्वय छम चॉन्य  
कॅम्य सॉ नीनवु कांगुर म्यॉन्य

काचुर तु छाचुर असान छम  
राविहेख पानस पेयिहेख बम  
अख छम व्वजुज ब्याख छम तॉन्य  
कॅम्य सॉ नीनवु कांगुर म्यॉन्य

बूजिथ कांगुर अख जॅन्य आयम  
बाया दिम सॉ मॉफी व्वन्य  
नीमुन्न ऑसुनय निकन म्यॉन्य  
कॅम्य सॉ नीनवु कांगुर म्यॉन्य

दोपुमस कन रठ व्वन्य मा करख  
सोरुय बूजिथ येतिथुय मरख  
छुहम पनुन किनु गॉर जॉन्य  
कॅम्य सॉ नीनवु कांगुर म्यॉन्य

★ ★ ★

## ७. हयो शाम लालो

हयो शामु लालो बु कोताह च़ालय  
सबाये अंदर छिम कडान जामु नालय

लँजिस व्वपुरन मंज़, वँजिस वँकम्य बु शापन  
गँजिस शर्मि दादे लँजिस गिल बु ज़ालस  
हयो शामु लालो बु कोताह च़ालय

सबासद बनेमुत्य छि मोनिक च़त्रज़न  
यि क्या ओस दयन ल्यूखमुत मे कृपालय  
हयो शामु लालो बु कोताह च़ालय

दँरियोधनन सूज़ मेय निश दुशासन  
रँटिथ केशि अँनिनस च़ँटिथ जामु नालय  
हयो शामु लालो बु कोताह च़ालय

च़ु छुख दीन बंदु, मु मँशराव मे दीनस  
ऋषीकेशु अशिने वसान छम मे च़ालय  
हयो शामु लालो बु कोताह च़ालय

पेयी मा नैदुर च़े, सदा छुख ना बोज़ान  
गँयी कोत दया वुन्यक्यनस ही दयालय  
हयो शामु लालो बु कोताह च़ालय

मे वुन्यक्यन करान छुम नु कांह ति ह्यमायथ  
चु रछतम तु वुछतम, छसय कमि हालय  
हयो शामु लालो बु कोताह च्चालय

दया सागरु कर दया नीलु कँठस  
चु दिम पानु दर्शुन, यितम अंतुकालय  
हयो शामु लालो बु कोताह च्चालय

★ ★ ★

## ८. वादु कॅरिथुय

वादु कॅरिथुय येति हय द्रामय  
चेर क्याज़ि गोस कोनय आमय

बरु कॅरनस क्याह करु लॉनिस  
तीर लॉयिन जिगरस म्याँनिस  
सनु कोरुनम तनु नय आमय  
चेर क्याज़ि गोस कोनय आमय

वॅछ वॉलिंज हावस मुन्नरिथ  
कोछ पन ज़न थॅवनस पुन्ननिथ  
हृदयस ति मै दौदुर च़ामय  
चेर क्याज़ि गोस कोनय आमय

पास स्वनुसुय कॅरनम सरतल  
बालि दिच्चुनम लॉनिन्य करतल  
खून पनुने सोज़स नामय  
चेर क्याज़ि गोस कोनय आमय

दूदु च़ूर हय मखन च़ूर हय म्योन  
वॅन्यवी हूरव त्वहि मा ड्युँठुवोन  
नाव तॅम्यसुंद छु राधे शामय  
चेर क्याज़ि गोस कोनय आमय

बनसी वायान लायान कम तीर  
छवकुलद छि गछान कम कम वीर  
तीर लायान लायान द्रामय  
चेर क्याज़ि गोस कोनय आमय

बुंबु खंजर बेयि तीर कमान  
दूरि प्यठय हूरन छु लायान  
बर मंदिन्यन केरुनम शामय  
चेर क्याज़ि गोस कोनय आमय

राधा छस तन बु नाँविथ  
स्वनु महारेन्य छस पॉरॉविथ  
तनि मँडिमृत्य स्वरगुक्य जामय  
चेर क्याज़ि गोस कोनय आमय

स्वरगु मंज़य स्वरगुचि हूरे  
दिल ह्यथ गोम चूरे चूरे  
चूरि न्यसुब शबन द्रामय  
चेर क्याज़ि गोस कोनय आमय

वादु कॅरिथुय येति हय द्रामय  
चेर क्याज़ि गोस कोनय आमय

★ ★ ★

## ९. कर साँ म्योन न्याय अंदे

कर साँ म्योन न्याय अंदे  
मॉर्य मंदे मदन वारो  
कर साँ म्योन न्याय अंदे

छोंडुमख हनि हने  
वनि आहँम नो वफादारो  
गोछु हमा ब्रोंठु कने  
मॉर्य मंदे मदन वारो

बाल कॅरथस गटे  
हटि तलुके म्वख्तय हारो  
गंडुथो बु अकि लटे  
मॉर्य मंदे मदन वारो

स्वन छम पामु दिवान  
कामु दिवो जानावारो  
तनु वोतुम रिवान  
मॉर्य मंदे मदन वारो

शबु अकि यूर्य यितम  
यारु म्याने सितमगारो  
रोशि दीदार दितम  
मॉर्य मंदे मदन वारो

कर सॉ म्योन न्याय अंदे  
मॉर्य मंदे मदन वारो  
कर सॉ म्योन न्याय अंदे

★ ★ ★

## १०. हा जानि अँजीजो

हा जानि अँजीजो, व्वला गूर करॉयो  
मति लाल जरॉयो, व्वला गूर करॉयो

पनुन्यव तु परायव, दोस्तव तु रँफीकव  
बनुनस ति ग्यूलुहमो, व्वला गूर करॉयो

थरि हुँदि ग्वलाबो, कथ जायि फोलुहँमो  
मुश्कि चानि बलॉयो, व्वला गूर करॉयो

वुडुर हुँदि क्वंगु पोशो, कथू जायि फोलुहँमो  
पोंपर जाय छयो, व्वला गूर करॉयो

डलु के पम्पोशो, कथू जायि फोलुहँमो  
बडि डलु जाय छयो, व्वला गूर करॉयो

व्वलु लालु गछव डल, मंज़ु छा हज़रतबल  
स्वनु लाँकि तरॉयो, व्वला गूर करॉयो

दँरियावु तरुन प्योम, सनि खोतु सोन बास्योम  
कमि तारु तरॉयो, व्वला गूर करॉयो

मँजनून खोत नँजिदस, लॉल च्चायि मज़ारस  
लॉलि हुँदि मँजनूनो, व्वला गूर करॉयो

र्वपु र्वनि अंजोलुय, श्र्वनि दार मंजोलुय  
चंद्रनुक बु गरॉयो, व्वला गूर करॉयो

शाहबाज़ अयाज़ो, व्वला महमुद्य वाज़ो  
शाहनामु परॉयो, व्वला गूर करॉयो

★ ★ ★

## ११. द्रायि फुलयाह

द्रायि फुलयाह बादाम वारि लोलो  
करु पूजा जगत अम्बायि लोलो

व्वथू पानो खसू व्वन्य प्रक्रमसुय  
बर वॅथ्य छी अच्चू तति ज्ञानु गरसुय  
वछि वॉलिंजि बजि बावनायि लोलो  
करु पूजा जगत अम्बायि लोलो

शिव शिवय बोलान वात डेडि तल  
आदि दीव तति कासी जन्मुक मल  
न्यरमल बन तु नेर सादनायि लोलो  
करु पूजा जगत अम्बायि लोलो

फेर अँद्य अँद्य लोलु सान सत् रेशिनुय  
सत् रेशिने प्रावख आदिकार च्युय  
सत् गाश नेरि चथ मायायि लोलो  
करु पूजा जगत अम्बायि लोलो

कालु बयि निशि रछिवुन्य छि मॉज कालिका  
बिहू साथाह मनि मंज दार धारना  
बडि क्रख लाय माजि अम्बिकायि लोलो  
करु पूजा जगत अम्बायि लोलो

नंदन वन शूबान क्याह छु आंगन  
अशि वानि सुत्य तति दियिव श्रूच माज़न  
गुत्य गँड्य गँड्य पँरिव त्वतायि लोलो  
करु पूजा जगत अम्बायि लोलो

त्राव पादु तलुची माया ज़ाल  
खसू हेरि हेरि ह्यसु सान सूहम बाल  
पावि पावे पूर श्रदायि लोलो  
करु पूजा जगत अम्बायि लोलो

लोलु ज़ालतो हृदयुक रत्नदीप  
प्रान आलवय अँद्य अँद्य बेयि दूप दीप  
बँरगु बँरगय अर्ग पोश मनु लोलो  
करु पूजा जगत अम्बायि लोलो

अचू अंदर मूच ज़न बिंद आकार  
जरु अँछ ज़ु पादन य्वसु छि साक्षातकार  
प्राव आनंद यूग मायायि लोलो  
करु पूजा जगत अम्बायि लोलो

वसू लोत लोत हेरे निशि हॉरी  
छस बु गृहस्ती कास्यम स्वय खॉरी  
बनि यॉरी तसुंजे रायि लोलो  
करु पूजा जगत अम्बायि लोलो

पुखरुडडल छुड नुडरडल ङल नलडस  
अडुत कुंड शूडलन डंङ लललललस  
ओ गलल गलल गुरु डलवनलडल लोलु  
करु डूङल ङगत अडुडलडल लोलु

डुशल डतल वुछ डुशल कुडल अलडल डललनस  
ही तु डसवल वुडनु गललड डूङल ललगस  
डूङ शलरलकल छलवुनल डुरलडल लोलु  
करु डूङल ङगत अडुडलडल लोलु

★ ★ ★

## १२. च्नु माता कासतम मे गम

च्नु माता कासतम मे गम  
बु लागय बावु कोसम

च्नु माता क्याज़ि रूठुख  
खँटिथ कथ जायि बीठुख  
दितम दर्शुन च़ल्यम गम  
बु लागय बावु कोसम

छु बोड दरबार चोनुय  
वंदस ना वँबीलु क्रोनुय  
शोलु मारान वेलकम  
बु लागय बावु कोसम

बु मा वोतुस च़े निश ज़ांह  
न ज़ानय पाठ पूज़ा  
तवय शर्मदुगी मे छम  
बु लागय बावु कोसम

दज़ान छुय दूप तु कोफूर  
वज़ान छुय साज़ संतूर  
नगारन सोज़ मदहम  
बु लागय बावु कोसम

ग्वडुन्य कर श्वद मे वॉनी  
दोयिम दिम पॉरज़ॉनी  
त्रेयुम त्रेयलूकि मंज़ मे छम  
बु लागय बावु कोसम

कोरुथ च्वन वीदन च़े अंद  
छु पंज़िम परमानंद  
शेयिम शेवु रुप बासतम  
बु लागय बावु कोसम

सॉतिम बासतम सत्य रुप  
च़ल्यम अज्ञानुक कुफ  
ति डीशिथ दूर च़ल्यम यम  
बु लागय बावु कोसम

च़ अष्टा दशबुज़ा छख  
अख बोगा मे शेरख  
च़े माता क्या गछी कम  
बु लागय बावु कोसम

★ ★ ★

## १३. जय दुर्गे

दूरगथ मे हरतम मॉज दुर्गे  
जय दुर्गे माता जय दुर्गे

च्य छख रॉगिन्या, च्य शारिका  
अष्ट लक्ष्मी छख च्य अम्बिका  
सासु बँद्य रुप छख रछान दुर्गे  
जय दुर्गे माता जय दुर्गे

गंड छुम कोरमुत मायाये  
मोह ज़ालस मंज़ तृष्णाये  
मखु सुत्य च़ठतम बेडि दुर्गे  
जय दुर्गे माता जय दुर्गे

छस बु अनपड मॉज, छुम नु मे ज्ञान  
करु क्या सूंच सूंच छस बु केशान  
रुच वथ मे हावतम पानु दुर्गे  
जय दुर्गे माता जय दुर्गे

फवलनस मे आमुत बावुक पोश  
पोशि मोत ह्यथ छुय मनु पम्पोश  
शेरि चानि लागय मॉज दुर्गे  
जय दुर्गे माता जय दुर्गे

आसय त्रेय निश मॉज शरन  
पान पुशिरोवमय तु प्योसय परन  
रछतम पादन तल मॉज दुर्गे  
जय दुर्गे माता जय दुर्गे

कन थव मे नादन तु फॅरियादन  
सुतय सुतय रोज़तम हर सातन  
गलि गलि चावतन अमृत दुर्गे  
जय दुर्गे माता जय दुर्गे

आलुवय जुव तु जान दूप कने  
बावुक संज़ लागय पोशि कने  
स्वन मन प्रान वथरय मॉज दुर्गे  
जय दुर्गे माता जय दुर्गे

हृदयस मंज़ मे रोज़तम सनम्बख  
छुम कल्यान सुय बेयि परम स्वख  
लागय ना वँद्य वँद्य मॉज दुर्गे  
जय दुर्गे माता जय दुर्गे

पाप शाफ कासतम पानु दुर्गे  
जय दुर्गे माता जय दुर्गे

★ ★ ★

## १४. सुदामु

सुदामुन्य त्रय वनान तस सुदामस तो  
गछतो अस्तु वनतु बगवानस

मित्र बाव प्रोन छुय सुत्य कृष्णस तो  
बोजि ना करिहे व्यपदा दूर  
असि क्या लजा छा तस मंगुनस तो  
गछतो अस्तु वनतु बगवानस

तोरु तॅम्य दोपुनस आसि युस पस तो  
प्रजुनावि कति तस बोय बंद तु यार  
योत गछि तति तस दकु लगुनस तो  
गछतो अस्तु वनतु बगवानस

न्यथु नॅन्य शुर्य छिम वनु बु कस तो  
दरिद्र बाव असि त्राव्या जांह  
द्वख वुछ वुछ छिम छ्वख बदनस तो  
गछतो अस्तु वनतु बगवानस

छरि अथु किथु पॉठ्य बुथ हावस तो  
ती वॅनिथ सुदामन अॅश दार हॉर  
छुम क्या ती निमु तस मित्रस तो  
गछतो अस्तु वनतु बगवानस

लेजि मंज कनि नाट लॉजिन पाकस तो  
ती वुछिथ शुर्य म्यॉन्य क्या गछन ख्वश  
द्यद दियि बतु असि नैदुर पेयि मस तो  
गछतो अस्तु वनतु बगवानस

लेजि मंज कोम म्वठ तमि हॉवनस तो  
दोपुनस सुदामन गंडु कथ बो  
यथ जंदस छम नु वथ गंडुनस तो  
गछतो अस्तु वनतु बगवानस

जंदु हरि मंज बाग कोम गौडुनस तो  
ती गँडिथ सुदामन कोड प्रस्थान  
दँछिन्य किन्य कन्या जंगि आयस तो  
गछतो अस्तु वनतु बगवानस

द्वारिकायि वॉतिथ लोग व्यच्चारस तो  
कवु आस किथु आस छुम गछुन कोर  
यारस छुम गछुन सार बावस तो  
गछतो अस्तु वनतु बगवानस

द्वारिकायि वॉतिथ गव क्षूबस तो  
शेछ म्यॉन्य कुस नियि राजु दरबार  
मंदुछान ओसुय वति पकनस तो  
गछतो अस्तु वनतु बगवानस

डेडि प्यठ लोग अरु सरु करनस तो  
कुस वन्यम कस वनु अँदरिम कथ  
मंदुछान ओसुय नोन वनुनस तो  
गछतो अस्तु वनतु बगवानस

पतु ब्रोंठ अँद्य पँख्य लोग वुछिनस तो  
जॉन्यकार ऑसिथ बन्यव अनज़ान  
चूरि चूरि चनु ख्योन याद प्तव तस तो  
गछतो अस्तु वनतु बगवानस

डीड्य वॉन्य पृछनि लँग्य तस सुदामस तो  
क्या सना ब्रह्मन छु छंडान कस  
अर्जर किनि तिम वनुनि लँग्य तस तो  
गछतो अस्तु वनतु बगवानस

ब्रह्मनु किथु आख यथ तरफस तो  
बासान छु पँक्य पँक्य छुख च्नु थोकमुत  
चारु क्या छुय कर्म फल बूगनस तो  
गछतो अस्तु वनतु बगवानस

सुदामा लाचार गव वनुनस तो  
फीरिथ वोनूनख छुस बु सुदामु  
दर्शनु आमुत छुस मित्रस तो  
गछतो अस्तु वनतु बगवानस

कसू दर दिलस तय कसू मित्रस तो  
मति गरि द्रामुत छुख च्च अनज़ान  
वुनि छय सुल गॅर गरु गछुनस तो  
गछतो अस्तु वनतु बगवानस

मित्रस म्यॉनिस श्री कृष्णस तो  
दॅप्यतोस आमुत छुय यि बालुयार  
ति बूज़िथ डीड्य वॉन्य असनि लॅग्य तस तो  
गछतो अस्तु वनतु बगवानस

यि वुछिथ सुदामु आव होशस तो  
मनु तारि मित्रस लोयुन नाद  
कृष्णस आसन लोग हिलुनस तो  
गछतो अस्तु वनतु बगवानस

चोरि पावि अख व्वठ यॅन्न गॅयि तस तो  
पतु द्रायि लारान अष्ट सेदी  
डेडि प्यठ यारस मीळ्य दित्यनस तो  
गछतो अस्तु वनतु बगवानस

ल्वलि मंज़ ल्वलुविथ लोल बोरुनस तो  
वातुनोवुन प्यठ देवान खान  
पीताम्बरु सुत्य मल छोलुनस तो  
गछतो अस्तु वनतु बगवानस

कृष्णन पृष्ठगौर यँच वँरनस तो  
शुर्य बॉच वनतम वारय छा  
ज्ञानान ओस पानु लोगुन बेह्यस तो  
गछतो अस्तु वनतु बगवानस

बगवान यँच गव मंज हर्शस तो  
वनुनि लोग रॉनियन छुम यि बालुयार  
रॉनियव बूजिथ बडि ओसुहस तो  
गछतो अस्तु वनतु बगवानस

बगवान वनुनि लोग तस सुदामस तो  
दोपुनस प्रसादाह क्या ओनुथम  
मंदछान सुदामा नोन कडुनस तो  
गछतो अस्तु वनतु बगवानस

दबुदब वँरिथुय कोम कोडुनस तो  
जल जल बुसि बुसि कोरुनस ग्रास  
रुखमनि केंह पँल्य थपि नीनस तो  
गछतो अस्तु वनतु बगवानस

केंह द्वह तति रूजिथ सुदामस तो  
गरुबार शुर्य बॉच याद पेयि तस  
ऑगिन्या हेचुनस गरु गछुनस तो  
गछतो अस्तु वनतु बगवानस

गरि युथ द्रामुत ओस नंगु मस तो  
द्राव त्पुथुय कृष्ण दरबारु मंजु सुय  
मंदुछान व्वन्य ओस गरु गछुनस तो  
गछतो अस्तु वनतु बगवानस

सुदामा वोतुय मंजु गामस तो  
थजि जायि वुछनय मँहलु खानाह  
ती वुछिथ सुदामा गव क्षूबस तो  
गछतो अस्तु वनतु बगवानस

★ ★ ★

## १५. कॅम्यू नियि प्रॉटिथ

ओस कस रूज़िथ अँदरी वॉर  
कॅम्यू नियि प्रॉटिथ म्यॉन्य पनु पॉर  
मुरलीदरु सुंद मा छुम यि खॉर  
कॅम्यू नियि प्रॉटिथ म्यॉन्य पनु पॉर

थोकमुत सुदामा गरु येलि आव  
नेत्रव त्रोवुन अशि देंरियाव  
येति कुस राज़ाह रोज़ान गॉर  
कॅम्यू नियि प्रॉटिथ म्यॉन्य पनु पॉर

कति छुम गरुबार योत कोत आस  
फाकय वालिंजि गोम तलवास  
गॉमुन्न कोत म्यॉन्य तुलसी वॉर  
कॅम्यू नियि प्रॉटिथ म्यॉन्य पनु पॉर

आयि कति येति यिम गुल तु गुलज़ार  
पॉदु कति गॅयि यिम म्वख्तु फमवार  
रंगु मंदोर्यन लॅज ना तॉर  
कॅम्यू नियि प्रॉटिथ म्यॉन्य पनु पॉर

आयि कति येति यिम दास दाँसी  
शुर्य म्यॉन्य मा गॅयि वन वॉसी  
मायि हँन्न बाँर्या द्रायम ना मे सॉर  
कॅम्यू नियि प्रॉटिथ म्यॉन्य पनु पॉर

कोत गॉम माँसूम स्वंदर पोश  
लोल आम वुछिहँख रोवुम होश  
मूरान गुल्य ओस प्राटान दॉर  
कँम्यू नियि प्रॉटिथ म्यॉन्य पनु पॉर

यि वुछिथ सुदामा गव परेशान  
वेखच्चय माया ओस डेशान  
द्रायस सुशीला बुधि वन हॉर  
कँम्यू नियि प्रॉटिथ म्यॉन्य पनु पॉर

ओस कस रूज़िथ अँदरी वॉर  
कँम्यू नियि प्रॉटिथ म्यॉन्य पनु पॉर  
मुरलीदरु सुंद मा छुम यि खॉर  
कँम्यू नियि प्रॉटिथ म्यॉन्य पनु पॉर

★ ★ ★

## १६. जगत अम्बा

जगत अम्बा तुलमुलि रोजान  
बोजान छख म्यॉन्य जार  
सनु गोम जिगरस, ज्ञेय रोस बु वनु कस  
पानय छख चु औतार

गरु गरु करान केह नय सोरमय  
कोरमय मे वॉरान पान  
हर हर त्रॉविथ गरु गरु मे रूदुम  
कॉच्चाह द्रायस अनजान  
सर कर यि समसार सोर नय छु नेरान  
यि छु तावनुन बाजार  
जगत अम्बा तुलमुलि रोजान  
बोजान छख म्यॉन्य जार

आवलुनिसुय मंज ग्वतु छस बु मारान  
लोबुमय नु मे कुनि तार  
क्या करु व्वन्य किथु अपोर लगि तार  
गॉमुन्न छस बु लाचार  
आरु हॅन्न चॉनिस बरस तल बु प्रारान  
केछा यीतनय ज्ञे आर  
जगत अम्बा तुलमुलि रोजान  
बोजान छख म्यॉन्य जार

दूह तय राथ गोम सारान तु सौबुरान  
अपजुय करान व्यवहार  
अँन्य अँन्य तु ज़ीन्य ज़ीन्य तमनाह मे द्रामय  
पतु थोवनम शाहमार  
शुर्य बॉन्न बॉय बंद, यि छु अपजिकुय फंद  
मतलबु कुय छु बापार  
ज़गत अम्बा तुलमुलि रोज़ान  
बोज़ान छख म्यॉन्य ज़ार

योत यिथ ज़न्मस कुत्याह कॅरिम कार  
कुत्याह बनाँविम यार  
मारु बु कॅरनस येम्य सम्सारन  
पतु वथ मे थँवनम लार  
अंतु समयस प्यठ कॅम्यसुंज़ मे छम सथ  
कांह नय यिवान दरकार  
ज़गत अम्बा तुलमुलि रोज़ान  
बोज़ान छख म्यॉन्य ज़ार

दकु ज़द बु पेमुन्न थोद मे ति तुलतम  
सोरान आम ल्वकुचार  
बुजिरस बु करु क्याह ल्वकुचार चॅलिथ गोम  
मंज़ वति कॅरनस खार  
आशा मे चॉन्य छम च्युय व्वन्य रछतम  
करतम योहय व्वपकार  
ज़गत अम्बा तुलमुलि रोज़ान  
बोज़ान छख म्यॉन्य ज़ार

ब्रह्मा विष्णु दीवी तु दिवता  
शंकर तु गनपथ कुमार  
दसबस्तु चॉनिस होकुमस छि प्रारान  
क्याह करु मॉज इज़हार  
शक्ती च्युय थॅज़ बक्ती दिवान  
दिवान बवुसरु तार  
ज़गत अम्बा तुलमुलि रोज़ान  
बोज़ान छख म्यॉन्य ज़ार

सत् ज़न साँरी सॅनियास दॉरिथ  
चॉनी छि बखुरदार  
पादन चान्यन कलु दॉर्य दॉरी  
त्रेय कुन करान ज़ारुपार  
बॅखुत्य आमृत्य सेदि बुथि दितु तार  
आमृत्य छिय व्वमेदवार  
ज़गत अम्बा तुलमुलि रोज़ान  
बोज़ान छख म्यॉन्य ज़ार

★ ★ ★

## १७. बालि छुमय रुमु रुमय

बालि छुमय रुमु रुमय  
मे हा यारु चोन तमन्ना  
बालि छुमय रुमु रुमय

व्वगु किन्य मे ड्यूठुम हय  
च्वगु लॉगिथ आंगन हय च्नाव  
रोगि रोगि च्चोलुम हय  
मे हा यारु चोन तमन्ना  
बालि छुमय रुमु रुमय

पशि किन्य मे ड्यूठुम हय  
फ्यरन लॉगिथ आंगन हय च्नाव  
बोश क्याह मे रोठुनमय  
मे हा यारु चोन तमन्ना  
बालि छुमय रुमु रुमय

काँनी किन्य मे ड्यूठुम हय  
वोन्य लॉगिथ आंगन हय च्नाव  
दानि दानि बु गॉजिनसय  
मे हा यारु चोन तमन्ना  
बालि छुमय रुमु रुमय

दारि किन्य मे ड्यूटुम हय  
कारि व्वगुन जानावार  
हारि तोतु रूटुम हय  
मे हा यारु चोन तमन्ना  
बालि छुमय रुमु रुमय

द्वसि किन्य मे ड्यूटुम हय  
तोसु लॉगिथ आंगन च्राव  
गोसु क्याह मे रोटुनमय  
मे हा यारु चोन तमन्ना  
बालि छुमय रुमु रुमय



## १८. प्रबात आव पोशि नूलो

प्रबात आव पोशि नूलो वन  
स्वंदर वॉनी प्रसंद करू मन

हतो ज़ीवो प्यतो पायस  
गोमुत छुख च़ु नैदरि अज्ञानस  
यि आलुछ छुय यिमन जंदन  
स्वंदर वॉनी प्रसंद करू मन

नैदर मो त्राव यिथिस वख्तस  
सत्या युग ब्यूठमुत तख्तस  
यि मंगुन छुय ति मंग वुन्यक्यन  
स्वंदर वॉनी प्रसंद करू मन

परान दीव दीव-लूकन मंज़  
करान लीला यिमन ...  
यियी नय पछ दि कन वुन्यक्यन  
स्वंदर वॉनी प्रसंद करू मन

त्रेतायुग द्वापरय कलियुग  
तिहुंद सॉमी छु सत्यायुग  
तैमिस निश फल बन्यम वुन्यक्यन  
स्वंदर वॉनी प्रसंद करू मन

पवन सुमरन छु गरि द्रामुत  
द्वहस ओसुस नु अथि आमुत  
तवय द्राव सुलि रटन वुन्यक्यन  
स्वंदर वॉनी प्रसंद करू मन

मंगान युस यी, दिवान तस ती  
तॅमिस सुत्य आसवुन शिव जी  
ग्वडुन्य बोज़ान त्वता बखत्यन  
स्वंदर वॉनी प्रसंद करू मन

मुरख युस आसि खेयि जादु हन  
नैदुरि मंज़ पेयि पोशाह ह्यू ज़न  
सु किथु पॉठ्य व्वथि प्रबात समयन  
स्वंदर वॉनी प्रसंद करू मन

छु बुलबुल बोलि मंज़ दिथ ताल  
ज़पान गोविंद तु हे गोपाल  
दपान दीवन छु वुज़नावन  
स्वंदर वॉनी प्रसंद करू मन

वज़ान सेतार मुरली नय  
ज़पान शिव शिव शम्बू जय  
यि वॉनी छय वनान दीवु ग्वन  
स्वंदर वॉनी प्रसंद करू मन

सॅमिथ लॅग्य करनि गूव्यंद गू  
कुकिल लॅज करनि ही शम्बू  
मे ब्रोंठु कनि बूल पोशि नूलन  
स्वंदर वॉनी प्रसंद करू मन

ग्यवान कोस्तूर छि बागन मंज़  
परान लीला करुनि लॅग्य संज़  
परान श्री राम रघुनंदन  
स्वंदर वॉनी प्रसंद करू मन

नैदुर मो त्राव गछू हुशियार  
बनख दर्मुचि सबायि म्वखतार  
करख रुत बोग मंज़ स्वरगन  
स्वंदर वॉनी प्रसंद करू मन

सोपुनस मंज़ बन्योव राज़ाह  
छि लक्ष्मी दायि इस्तादाह  
हुशार येलि गव बन्योव न्यर्दन  
स्वंदर वॉनी प्रसंद करू मन

फवलनि लजि व्वन्य संगरमालय  
ज़गत प्रज़लान छु कमि हालय  
यि सोन मंदर छु क्याह ज़ोतन  
स्वंदर वॉनी प्रसंद करू मन

नेदुर युस त्रावि यथ वख्तस  
दियस आराम तु बेयि मोह मस  
तँमिस कति रोज़ि ज़न्मन छ्यन  
स्वंदर वॉनी प्रसंद करू मन

करिय युस नैदरि वुन्यक्यन नाश  
अँछव वुछि आत्म सिरिं प्रकाश  
बन्यस अदु साद सम्बंदन  
स्वंदर वॉनी प्रसंद करू मन

प्रबात आव पोशि नूलो वन  
स्वंदर वॉनी प्रसंद करू मन

★ ★ ★

## १९. अज़ हय यियि शंकर

अज़ हय यियि शंकर साक्षातकार  
गौरी शंकरु सुय नमसकार

सूरु मोत गोसोन्या नंगु बाबा  
सुह मुसलाह वॅलिथ जेटि गंगा  
हटि छुस वासुक डेकि छुस गवार  
गौरी शंकरु सुय नमसकार

शिवरात्री हुंद अज़ छु व्वपवास  
शिव शक्ती हुंद अज़ छु अथुवास  
करुहोस पूजा बारम्बार  
गौरी शंकरु सुय नमसकार

वंपु तनि शूबान गायत्री नॉल्य  
त्रि नेत्र दारवुन, कनन कनु वॉल्य  
ओमकार रुपु छुस डखु शाहमार  
गौरी शंकरु सुय नमसकार

दीवी तु दिवता छि रास खेलान  
सरस्वती छि पानय वीद वखनान  
ब्रह्मन परान छिस महिम्नापार  
गौरी शंकरु सुय नमसकार

बगवानु मे ति दितु पानु दर्शुन  
लोलु सान करुहॉ पोशि वरुशुन  
कीवल हरीहर छु बारम्बार  
गौरी शंकरु सुय नमसकार



## २०.चित्रगुप्त दर्म राजु छुय नमसकार

चित्रगुप्त दर्म राजु छुय नमसकार  
अंतु समयस प्यठ दिज्यम शेहजार

चिठ्य ह्यथ येलि हो नेर्यम काल  
मन म्योन थँविज्यन स्यठाह ख्वशहाल  
न सूजिज्यम रूग कांह, न थँविज्यम ब्यमार  
अंतु समयस प्यठ दिज्यम शेहजार

कंठस प्यठ येलि वातुनम प्रान  
मन म्योन थँविज्यन स्यठाह सविदान  
बु परय गीता तु राम औतार  
अंतु समयस प्यठ दिज्यम शेहजार

मोर रोजि येत्य तय नेर्यम रूह  
साँरी परनम शेव शम्बू  
श्रान दिथ परनम महिम्नापार  
अंतु समयस प्यठ दिज्यम शेहजार

यि छु सम्साराह अपजुय छल  
येलि वातुनावनम शुमशानबल  
चोरि अंदु गंडुनम पनुन्य टाँठ्य नार  
अंतु समयस प्यठ दिज्यम शेहजार

सुतुतु सुतुतु पकुनम यिमय यमदूथ  
मे दिऒुतुतुतु पनुनी ऒानुक बूथ  
वैतार नँदी दिऒुतुतुतु सेदि बुथि तार  
अंतु समयस प्यठ दिऒुतुतुतु शेहजार

व्वलो यँद्राऒो गायन बोऒ  
छुम वऒान अँदरी लोलुक सोऒ  
इँद्र पदवी प्यठ छु चोन दरबार  
अंतु समयस प्यठ दिऒुतुतुतु शेहजार

शंकर जी छम मे चॉनी आश  
क्या खबर कति डोलि म्यॉनी लाश  
जान पनुन बु वंदय छस गमखार  
अंतु समयस प्यठ दिऒुतुतुतु शेहजार

★ ★ ★

## २१. सुमरन पनुन्य दिन्नॉनम

सुमरन पनुन्य दिन्नॉनम, लोलुक निशानु वेसिये  
रँछरुन तोगुम नु रोवुम, ओसुम नु बानु वेसिये

पथ कालि छुम नु द्युतुमुत, स्वन म्वख्तु दान वेसिये  
अँन्य सारि क्याह लबख व्वन्य, तिम म्वख्तु दानु वेसिये

वॉलिंजि मंज़ थवुन गोछ, हावुन थोवुम अथस प्यठ  
राह कस छु कोर मे पानस, न्वखसान पानु वेसिये

हावुन छू रावुरावुन, छावुक समर छु खॉमी  
थावान छि छावु बापथ, बानन ति ठानु वेसिये

यनु सुय निशानु रोवुम, तनु मँन्न गँमुन्न तु फलुवा  
न्युन ह्योन नु कँह ति फेरान छस वानु वानु वेसिये

यछ पछ मु हार, ब्याखा ह्यथ यूर्य वाति कांछा  
तस छा वँमी निशानन, बँर्य बँर्य खज़ानु वेसिये

डोलान कोहन वनन मंज़, शोलान छि गुलशनन मंज़  
ज़ोतान छि तारकन मंज़, काँत्याह निशानु वेसिये

व्यसरिथ, डँलिथ, पथर प्यथ, बुथ क्याह दिमय तँमिस निश  
पथ फेरनुक्य पकान छा, यिथ्य हिव्य बहानु वेसिये

मानव जि अँस्य ह्यमव पथ, सोर्या तसुंद मोहबथ  
पयवंद यि आदनुक छा शुर्य दोस्तानु वेसिये

दिल फुट्यमुत्यन सु तोशन, यँन्न गँर्यमुत्यन छु रोशन  
गछ वँर्यमुत्यन स्वदामन, पृछ गँयिबानु वेसिये

अँद्य पँख्य तँती छु आसन, ब्वदु ब्रोर सूरदासुन  
बोज्ञान छु माय लॉगिथ लोलुक्य तरानु वेसिये

★ ★ ★

## २२. अँछ दर लजम

अँछ दर लजम बरस तल  
आलव च़ु बोज़ मॉजी  
मुन्नराव तौर्य बरन्यन  
औतार च़ु दार मॉजी

छख च़ुय अखंड च़राच़र  
सथ च़्यथ सखा परापर  
ग्वनमथ ग्यवान छि दूह राथ  
चॉनी तरानु मॉजी

आँदीन च़े छिय गँडिथ गुल्य  
दस बस्तु सिरिं च़ंद्रम  
गटि नाश गछ़ान छु बखत्यन  
सतुके प्रकाशु मॉजी

च़ुय छख दूखन तु दाद्यन  
दरदिल वुछान बखत्यन  
कोताह मे आव बँन्य बँन्य  
किथु छख ज़रान च़ु मॉजी

यस नम रटख च़ु नावे  
पर्मय गती सु प्रावे  
छख यीरु गॉमुत्यन च़ुय  
तारान पानु मॉजी

च्यथु गुर दवान मे हरदम  
विशयन तु बोगुनुय पथ  
दोगुनुय मे वोन ओगुन  
वर दिथ च्चु पानु माँजी

ख्वटि कर्मु रूपु क्रमनुय  
बवुसरु बु बंद कॅरनस  
रछतम च्चु वारु रछतम  
दुरदानु पानु माँजी

छखय पर्वत प्रकृती किन्त्य  
पूरन करान च्चु कारन  
व्यवहार चलान छु ज़गतुक  
ऑगिन्यायि चानि माँजी

सम्रथ छे कस तु वनि कुस  
अनि ज़्यव तु वखनि ग्वन कुस  
कनुनुय मे करतु शब्दाह  
वनवुन च्चु पानु माँजी

वोव क्याह मे माँज अज़ तान्य  
लोनु क्याह बु छस परेशान  
यि तु अज़ मे करतु कर्मस  
नज़राह च्चु पानु माँजी

पज़ी बु गोमतुय बंद  
त्रेश्नायि मोह ज़ालस  
लोग ना मे बेडि चौरिथ  
म्बकुजार दितम मे मॉजी

पोशिमोत दिवान फ्युर अज़  
मनि मंज़ यिमन खयालन  
तलय यि तु बोज़ पानय  
शुर्य दास्तान मॉजी

अँछ दरु लजम बरस तल  
आलव चु बोज़ मॉजी

★ ★ ★

## २३. शर हय जिगरस सौरुय द्रामय

नव दुर्गा सुत्य छुम रामय  
शर हय जिगरस सौरुय द्रामय  
सास सिरि तीज़ बरु चामय  
शर हय जिगरस सौरुय द्रामय

शीत स्वंदर म्वख छुस शूबान  
शेलपुत्री गदि प्यठ छि सनिदान  
मावस गॅयि ओकदूह आमय  
शर हय जिगरस सौरुय द्रामय

दुय तु दूगुन्यार सौरुय कॉसिथ  
ब्रह्मचरि ब्रह्मन जन्म दारिथ  
गटु चॅज तय गाश नोन द्रामय  
शर हय जिगरस सौरुय द्रामय

स्वख तु आनंद अमृत चॉविथ  
चंद्र गंटा गंटायि वॉयिथ  
स्वखु म्वखु सुय प्वख्तु करि खामय  
शर हय जिगरस सौरुय द्रामय

लक्ष्मी मातायि सुत्य यियि रामय  
पूजा करस बु सुबह शामय  
पॅत्यमि गरि रोज़ि सुत्य सुत्य मे पानय  
शर हय जिगरस सौरुय द्रामय

★ ★ ★

## २४. संतुष्ट रोज़तम

संतुष्ट रोज़तम गरि गरे  
कश्ट कासतम बगवान हरे

ब्रमुचे वुनरे ब्रँमुरोवुस  
मुह छटि अनिगटि वति रोवुस  
चैय रोस्त अथु रोट कुस मै करे  
कश्ट कासतम बगवान हरे

बवुसरु क्रुमनुय रँटचनम खोर  
यिम ज़ोर लॉगिथ बु गोस कमज़ोर  
बांबरि लोगुसो छांबरे  
कश्ट कासतम बगवान हरे

वयक्वंठु प्यठु यितु ननुवोरुय  
गर्डस खँसिथ त्रॉविथ सवॉरिय  
हरिना कश्यप अदु म्दु वुतरे  
कश्ट कासतम बगवान हरे

संकटु मंज़ु तस प्रहलादस  
कन थोवथस अर्ज़र नादस  
म्बकलोवथन संकटुनि थरे  
कश्ट कासतम बगवान हरे

★ ★ ★

## २५. माँज वनतय पाया म्योन

दोँद्य बावय थवख ना कन तय  
माँज वनतय पाया म्योन  
कूर ज़ायस दिचुमय सन तय  
माँज वनतय पाया म्योन

कोर मशवरु ममीयन तु डैडीयन  
बँड कूर छनु गरि शूबान  
ह्यँन्न फिकिराह डैडी जीयन तय  
माँज वनतय पाया म्योन

डोलि मंज़ येलि नीहस वॉर्युव  
फिकिरि तोरुम वॉरिवि छस  
स्योद वुछनस छस मंदुछान तय  
माँज वनतय पाया म्योन

हश आयम मँत्यमुर तुलने  
योरु दिचुमस पास स्वनु वॉज  
वॉज नय छस दून हारन तय  
माँज वनतय पाया म्योन

ज़नि च्वपॉर्य आयम वुछने  
कालु सँर्पिनि आयम बुछने  
थख नय कोरुख फिसरायन तय  
माँज वनतय पाया म्योन

अख ऑस वनान वुछी ज़ोजि हुंज़ ताल  
दज़दार नय छुस ज़ोजि हुंद ज़ाल  
तालु च़ोक नय आनन च़्वन तय  
मॉज वनतय पाया म्योन

गरथ नय छुस जान डेजिहॉरिस  
वस वॅम्य सना स्वनुरन गॅर्यनस  
म्वख्तु नय छुस अटुहार्यन तय  
मॉज वनतय पाया म्योन

माजि पोत्रव येलि वुछ सतराथ  
अथि आयख नु अमि मंज़ु पॅहराथ  
तूर्य सोज़ोख शिकस लदन तय  
मॉज वनतय पाया म्योन

हेरचु बॉगिस प्यठ छम फूंकान  
मॅन्न गाव ज़न आयम टूंकान  
बॉगुरावु क्या ऑशुनावन तय  
मॉज वनतय पाया म्योन

हश ऑसुम बुडिथुय प्यामुच  
च़तजीह दूह गासु मंज़ु द्रामुच  
च़्वचि वाज़स आनन च़्वन तय  
मॉज वनतय पाया म्योन

★ ★ ★

## २६. ग्वडन्य गनपत जीयस कुन कर नमसकार

ग्वडन्य गनपत जीयस कुन कर नमसकार  
पतय रठ राजि रेनि हुंद खास दरबार

वैनिथ क्याह ह्यकु बु माता चॉन्य लीला  
करय व्वन्य मूर्खगी किनु मूर्खु खेला

चु माता शारिका संतुश्ट मे प्यठ रोज़  
गदा आमुन्न बु दर गाह छस सदा बोज़

वैहरिथ ज़ाल समसारन वोलुम नाल  
करुम व्वन्य चारु नतु क्याह म्योन छुय हाल

मदन लूबन मूहन ह्योतुमुत छुनस तल  
यिमन च्वन मुश्किलन माता करुम हल

बु दर्शनस छस नु वातान न्यथ बु अँनी  
क्षमा पापन चु करतम मॉज बवॉनी

क्वठ्यन शक्ती अँछन थवतम पनुन गाश  
दरी दुनिया फकत चॉनी मे छम आश

मे मूरखस गछ्तु बूज़िथ मॉज बवॉनी  
सिवाये चानि वनु कस, कुस छु म्योनुय

दिलुक तमन्ना मे कडतम छस बु चॉन्य दास  
रक्षा करतम पद्यन चान्यन तलय आस

कर्म फलु किन्य अगर केंछा मे छिम पाफ  
क्षमा सागर चु येमि किन्य छख करख माफ

कलम तुल पानु लेख म्यॉन्य कर्म लीखा  
करुम स्येज कांह अगर हँज छम मे रेखा

कृपा सागर जगत माता छु चोन नाव  
शरन आसय पद्यन पनुन्यन तलय थाव

सिवाये चानि छुम नय कांह रछन वोल  
चु माता म्यॉन्य छख नय मॉज तय मोल

बजव अष्टादशव सुत्य कर मे रखिपाल  
चु येमि किन्य आसवुन्य छख दीन दयाल

चे रोस्तुय कस बु वनु कुस बोझि म्योनुय  
बु छस ना नाबुकार संतान चॉनिय

यि अख मँहशूर कथ प्रथ कांह छु ज्ञानान  
क्व-पोतुर छुय क्व-माता छय नु आसान

मंगुन छुम नय तगान बोजुन तगान छुय  
ज्यवुन शुर माजि यिथु पॉठ्य द्वद मंगान छुय

दिलस यँत्रकोल अमिकुय छुय मे हावस  
दितम दर्शुन लगय पॉर्य पॉर्य बु नावस

बु चान्यन पादि कमलन रथ वंदय ना  
लगय ना चानि मायाये लगय ना

लगय ना बजि दयाये त्रेय लगय ना  
यिमन पम्पोशि नेत्रन त्रेय लगय ना

मुकुट दौरी स्वंदर शेरस लगय ना  
यि केंछा छुम मे चोनुय छुम वंदय ना

चु छख ना राजि रेन्य राजन दिवान राज  
अतीत आमुत बु छुस दिम ज्ञानकुय ताज

गछान दिथ छख अँमीरस चुय अँमीरी  
दरे दुनियाह मे करतम दस्तगीरी

त्रे निशि शाहो गदा प्रथ कांह बराबर  
मे पादन तल कृपाये पनुनि अथु वर

बु ज़ॉरी छस करान त्रेय दस्तु बस्तय  
करय अर्पन जिगर ज़न पोशि दस्तय

दोयुम ब्याखा त्रे ह्यु छुम नु कांह ति दाता  
मे हर कुस्मय मदथ कर म्यानि माता

गँडिथ गुल्य छुस करान त्रे ज़ारु पारय  
पँतिमि वख्तय मतय करतम आवारय

परेशॉनी यि म्यॉनी करतु व्वन्य दूर  
यछाये दिल वँरिथ गछतम च़ु मंज़ूर

च़ु छख म्यॉन्य इश्ट दीवी कश्ट कासतम  
सदा संतुश्ट रूज़िथ मनि बासतम

वनान सॉरी छि चाने जायि स्यदु पीठ  
स्यदथ करतम मे म्वकुलॉविथ गछुम कीठ

मूर्ख-बोज़ु किन्य न छम शक्ती न बक्ती  
दयालू छख गछुम बखचिथ मे मुक्ती

बु छस ओरुत बनेमुच़ आरवल ज़न  
ग्वचर च़लिहेम बेहेम ऑयीनु ह्यु मन

अगर रछिहँम पद्यन तल कुस मे पोशम  
तवय किन्य चानि बक्ती ज़ांह नु पोर्थम

कोबूल गछतम वँरिथ व्वन्य म्यॉन्य ज़ॉरी  
वंदय रथ पादि कमलन मॉज च़वपॉरी

यि लीला परि युस सुबहन तु शामन  
तँमिस माता सफल करि मनि कामन

दपान दासस छि चॉनिस टॉठ बक्ती  
ब-दुनिया स्वख, यखबार दिम मे मुक्ती

★ ★ ★

## २७. कूत तुलु व्वन्य अज़ाब माँजी

बखुच अगर छिम खता मे खँत्यमुत्य  
बु कूत तुलु व्वन्य अज़ाब माँजी

हचर मे ज़न्मुक मचर मे आमुत  
तचर मे संतापुकुय छु द्रामुत  
शरन हय आसय बु चानि डेडि तल  
मे हावतु रुत ह्यू शबाब माँजी

वँनिथ बु ह्यकु क्याह चु ज़ानवुन्य छख  
मे ज़्यव गँयम कँज, अँशिस मे दार लँज  
वनुन तगान कँह मे माँज छुम नय  
मतय चु करतम जवाब माँजी

करुम चु मुरवत, बन्यम मे शफ़कत  
दया करुन्य माँज च़े निशि छि क्या कथ  
दया दृश्टी करुम चु माँजी  
छे चानि अँछ ज़न ग्वलाब माँजी

दितम मे शाँती, यि छुम अमार अख  
चु माँज म्यॉन्य छख, मंगुन छु म्योन हख  
दितम चु मिज़राब मे तारनुय व्वन्य  
वज़्यम मे मनकुय रबाब माँजी

करय बु वरनन चॉन्य ग्वन क्याह  
वॅनिथ हेकी कुस च़ु मॉज छख क्याह  
फकत स्यज़र बेयि पज़र मंगान छस  
छि वीद अति ला जवाब मॉजी

च़ु बेद दृश्टी मे मॉज हरतम  
दया सागुर्य दया मे करतम  
च़ु काम क्रूद लूब मे मॉज हरतम  
च़ुटुम च़ु अमिचे तनाब मॉजी

मे पोशिनय मंज़ सु पोश ड्यूटुम  
प्रबाव शीतल अम्युक मे ब्यूटुम  
अमिय पोशुक छुम मे सायाह  
हुरिन मे हर विज़ि हुबाब मॉजी

★ ★ ★

## २८. चानि डेडि तल बु आस

चानि डेडि तल बु आस येछि पछि माँजी  
यिनय त्रावुहम बु हय गछय लछि माँजी

नय ज्ञानय पाठ तय बेयि पूजा  
नय जोनुम अंगिन्यास बेयि संद्या  
चोन दाना गँडिथ छुम मछि माँजी  
यिनय त्रावुहम बु हय गछय लछि माँजी

यंथुर तय मंथुर क्या मे करनम  
नेशिब्वद छुस डंडवत छुय मे सर खम  
चोन नावाह खँनिथ छुम वछि माँजी  
यिनय त्रावुहम बु हय गछय लछि माँजी

त्रेय रोस्त माँज खोजान छुस क्षन क्षन  
मोह गटि मंज छारान गोस पन पन  
निशि रोजतम तु बेयि क्याह मे गछि माँजी  
यिनय त्रावुहम बु हय गछय लछि माँजी

होल गोम माँज सीनु व्वन्य मे आव फटनस  
म्वख हावतम स्वखुसान नादानस  
लोलु ख्यावथ किशमिश दूछि माँजी  
यिनय त्रावुहम बु हय गछय लछि माँजी

मत्तु त्रावतम हावतम पनुन शबाब  
कथ बोऒतम तु वुछतम लोलुक हुबाब  
अख अनुग्रह मे आगरुक गछि माँजी  
यिनय त्रावुहम बु हय गछय लछि माँजी

रंगु रंगु पोश लागय शेरि चाने  
ही तु मसवल व्यनु ग्वलाब वेरि चाने  
पोशि मोत हय आव येछि तय पछि माँजी  
यिनय त्रावुहम बु हय गछय लछि माँजी

★ ★ ★

## २९. चोन बजराह

चोन बजराह छु बडि बोड, मय कर चेर  
अँस्य छि माता साँरी हलम दॉर्य दॉर्य  
असि छु हाजथ विज़ि विज़ि असि कुन फेर  
अँस्य छि माता साँरी हलम दॉर्य दॉर्य

दूरि प्यठु मॉज आमृत्य अँस्य छि लारान  
मायि चाने डेडि तल अँस्य छि प्रारान  
नेरतय न्यबर जल जल मुन्नराव तॉर्य  
अँस्य छि माता साँरी हलम दॉर्य दॉर्य

बेकस तय बेबस अँस्य छि लाचार  
केंह नय संचिथ चंदु छेन्य अँस्य छि लाचार  
सर्व बोग तु आनंद असि कर जॉर्य  
अँस्य छि माता साँरी हलम दॉर्य दॉर्य

ड्यकु लान्यन सान्यन त्राव नज़राह  
अज़ लेखतय पनुनि अथु कर्मलीखा  
स्यज़राह तय पज़राह दितु मे अनवॉर्य  
अँस्य छि माता साँरी हलम दॉर्य दॉर्य

दर्मुच तय कर्मुच छनु असि ज्ञान  
अँछ वछु तय गाशु रोस्त छनु पॉर्यज्ञान  
आयि सोरान नोन हाव म्वख वन हॉर्य  
अँस्य छि माता साँरी हलम दॉर्य दॉर्य

ज़न्मु ज़न्मन ग्यूर आव असि फेरान  
यी वोव तय ती मॉज अँस्य छि लोनान  
छख च़ु माता अटि वाल कूठ व्वलुबोर  
अँस्य छि माता साँरी हलम दॉर्य दॉर्य

छुमय तमन्ना वुछिहँथ साक्षातकार  
परिपूर्ण सनम्वख बीज़ ओमकार  
पूज़ करुहँय पादन, सिहम सवॉर्य  
अँस्य छि माता साँरी हलम दॉर्य दॉर्य

पोशि मोत छुय लूकु बवन डेडि चानि तल  
मंडली ह्यथ पूज़ान छुय च़े निश्कल  
छख च़ु माता पादन लगय पॉर्य पॉर्य  
अँस्य छि माता साँरी हलम दॉर्य दॉर्य

★ ★ ★

## ३०. हॉरिये थावख ना कन तु लोलो

हॉरिये थावख ना कन तु लोलो  
ज़ार म्यॉन्य तोतस वन तु लोलो

मदनस वनतसे अनतसे आर  
वदनस छुम नु ज़ांह छूयन तु लोलो

बॉलिये वनतसे कॉल्य् राव्यम  
वॉल्य् कन ज़ॉल्य् छा स्वन तु लोलो

बादाम चेश्मु यनु मुज़राव्यन  
तनु छुम मँज़रावन तु लोलो

जुल्फु छस जीम तय मीम दहान  
सीमाब ख्वय सीम तन तु लोलो

सनु मै कोरनम कामु दीवन  
स्वनु छम पामु दिवन तु लोलो

हियि कोरनम क्वंगु पोशुक रंग  
योस्मन गँयम सोसन तु लोलो

हारुने तापय गॉजनस बो  
दॉन्य दान्य् शीनु मॉन्य ज़न तु लोलो

आलम गेलि तु क्याह छु परवा  
मेलि येलि सोदा वोन तु लोलो

बरुसय द्यन सँन्यास्यन सुत्  
करुसय तौवीज़ु पन तु लोलो

अँशकुने आवरेनि मंज़ छु पोंपुर  
नारु पान वारु ज़ालन तु लोलो

डूरि तय वेरनागु हेमुसय ज़ाग  
रोसुल मीर तँत्त् छु आसन तु लोलो

★ ★ ★

## ३१. माँज शारिकॉय गोश थवतम

माँज शारिकॉय गोश थवतम फॅरियादन तय  
चरनन बु वंदय जुव जान ह्यथ वॉलिंज वस तय

नेश ब्वद बालुक छुस बु आमृत बरस तल तय  
मोह गटि वोलमुत, वति डोलमुत छुस बेकस तय

चावतम मे माता ज्ञान रूपी मयखानु मस तय  
येमिके च्यनु सुत्य ज्ञान बनिहेम नादानस तय

मायायि वोलुनस यीरु छुनुनस मंज सँदरस तय  
बास्योम यि फर्शाह मखमल ह्यू ओस तल ज्युस तय

मीठ्य मीठ्य चारान गोम यावुन लोगुस दरु तय  
करतु मे अनुग्रह नम रठतम खारतम बोठ तय

वालु वाशि लोगमुत पॉजा छुस जंजालस तय  
मोल माँज शुर्य बाँच दन द्यार बेयि बंद बांदव तय

येमि विजि त्रावुनम हरदुचि मूरि थरु वथिहेम तय  
तमि विजि माता डोख चोन छुम अख अथुरोट तय

महामाया मूर्ख बावु किन्य शरन छुस तय  
बख्ते बावु किन्य लोल चरनन तल वरतम तय

ऑरलतलस डे दलतड सतु वुतुऑर डेडल शड दड तड  
गुरु रूडु रूऑतड हुदडस डंऑ हर सलतन तड

नुतुनूनुन ऑस डऑऑ थर थरु ऑड ललवे डूरे  
ऑूऑुर डे ऑलडुत डरु गूडुत डूसुड गुल तड

ऑरलरल ऑुवडूडू डलगवलनस डंऑ गूशलस तड  
गूसु डे तुरलवतड रूत हुू सग डलवुक डस तड

डूठुऑ हड डु दलडुहुड डऑऑ ऑलनुतन लूलु डलदन तड  
डडुडुशल नूतुरन डरड डदु कुतन शुरुवलन डलदन तड

नूथुर डु आलुवड डुवलन वंदड लूलु नलवस तड  
डूडू डूडू लगुहुड ऑलन वंदुहुड सुवडलवस तड

तुलडुलुतु नलगस नुतुथ वलतलन डुरकुडस तड  
डऑऑलडल डुशलन डुशल डतुतलसुड डूडुडुर डन तड

डऑऑ शलरलकुडू गूशल थुवतड डूरलडलदन तड  
ऑुरनन डु वंदड ऑुव ऑलन हुतु वूलललंऑ वस तड

★ ★ ★

## ३२. स्वख तु सम्पदा

स्वख तु सम्पदा दाद्यन दवा  
मॉज बाँगरान वुन्यक्यनस  
दाद्यन दवा, रूगन शफा  
मॉज बाँगरान वुन्यक्यनस

तस क्या छु गम यस च्चु आसख  
सपदनस मुश्किलन हल  
यीरु गॉमुत्यन बवु सागरस  
मॉज तारान वुन्यक्यनस

पूर्व पछिमु क्यन, दक्षनु व्वतरु क्यन  
मॉज रछिवुन्य छि पानय  
असवुनि म्वखु खसवुन्य सुहस  
मॉज फेरान वुन्यक्यनस

गुल्य गँडिथ छिय आमृत्य गदा  
लायान डेडि तल सदा  
ज्ञानुक्य तॉर्य पनुन्यव अथव  
मॉज मुन्नरान वुन्यक्यनस

सासु बज़ु नरि य्वसु छि दारवुन्य  
रछिवुन्य छय स्व दासन  
क्षनु क्षनु म्यानि कर्मुक्य न्याय  
मॉज अँज़रान वुन्यक्यनस

यस करान छख पर्द पूशी  
वुछि कति सुय सख्ती  
शर्नागतन वर्नि दामान  
माँज त्रावान वुन्यक्यनस

आसवुन्य छख च्नु ज्ञानु रूपी  
मूक्ष दाता ईशरी  
त्रेशि हतिनुय यूग अमृत  
माँज चावान वुन्यक्यनस

शूलु सुत्यन, खडकु सुत्यन  
माँज रछिवुन्य छि पानय  
ज़ार म्याँनी पनुन्यव कनव  
माँज बोज़ान वुन्यक्यनस

वारि वारे साँरी यिवान  
द्वख तु दाँद्य छिय बावान  
सर हय त्रावय तल पादन  
माँज टोठतम वुन्यक्यनस

रंगु रंगु माँज तंग आसय  
अज़ हय बास्योम डोख चोन  
पान पुशरिथ च्नेय अरपन  
माँज गँज़रान वुन्यक्यनस

कर्मची वदल, जन्मुची इहान  
विज़ि विज़ि करान नीम जाम  
साकिया मोय फिर मे प्यालन  
माँज चाव्यम वुन्यक्यनस

कोमल पोश ह्यथ छि आमृत्य  
अज़ हय आँठम दूह योर  
पोशि मोत हय तिम च़ॉर्य च़ॉर्य  
शेरि लागी वुन्यक्यनस

★ ★ ★

### ३३. जान वंदुयो यारि जानानय

बब माल्युन येलि छु आसानो  
खानुमाजर तेलि छु बासानो  
बबु म्यान्यो ज़िंदु रोज़ू पानय  
जान वंदुयो यारि जानानय

माजि माल्युन येलि छु आसानो  
राजि माल्युन तेलि छु बासानो  
मॉज पनुनी ज़िंदु रोज़ी पानय  
जान वंदुयो यारि जानानय

बॉय माल्युन येलि छु आसानो  
वुहुर्य शैयि रेत्य नज़राह दिवानो  
बायि म्याने हा अलाल खानय  
जान वंदुयो यारि जानानय

बाबी माल्युन येलि छु आसानो  
तोति माल्युन तेलि छु बासानो  
बाबी पनुनी राज करी च़ु पानय  
जान वंदुयो यारि जानानय

बेनि माल्युन येलि छु आसानो  
बेनि पानुवॅन्य सीर बावानो  
बेनि म्यॉनी राज करी च़ु पानय  
जान वंदुयो यारि जानानय

★ ★ ★

## ३४. ॐ श्रीमत ही बवॉनी

ॐ श्रीमत ही बवॉनी  
छय मे आशा चॉनी  
छय मे आशा बेयि व्वमेदा  
कीवल आशा चॉनी  
क्षनुसुय मंज़ दूख तु संकट  
दूर करतय च़ु म्यॉनी

छय च़े अरदाह ब्वज़ु बवॉनी  
छख सुहस प्यठ च़ुय सवार  
अँद्य अँद्य दिवता च़े सॉरी  
छिय करान च़ेय ज़ारु पार  
अष्ट सेदी ऑदीन च़े छय  
पाद चॉन्य न्यथ छलॉनी  
क्षनुसुय मंज़ दूख तु संकट  
दूर करतय च़ु म्यॉनी

येलि यँद्राज़ु बेयि दीव अँन्य  
तंग महिशासुरनुय  
यँद्राज़ु आव च़ेय शर्नुय  
पादन च़े प्योय परनुय  
पतु पतु तस दिवता आयि  
फ़क़ु हँत्य तु दोरानुय  
क्षनुसुय मंज़ दूख तु संकट  
दूर करतय च़ु म्यॉनी

बूज़िथ तिहुंद हाल सोरुय  
अदु महिशासुरसुय  
वातुनोवथन पाताल येलि  
ज़ीर दिच्चथस ख्वरुसुत्य  
म्वकुलॉव्यथख बयि निशि दीव  
वॅरथख मेहरबॉनी  
क्षनुसुय मंज़ दूख तु संकट  
दूर करतय च़ु म्याँनी

सिरिं तय बेयि च़ंद्रम छिय  
प्रारान च़ेय होकुमस  
कर करि मॉज बवॉन्य ऑगिन्या  
प्रकाश बनि ज़गुतस  
चानि प्रकाशु किन्य छु संतुश्ट  
त्रिबुवन रोज़ॉनी  
क्षनुसुय मंज़ दूख तु संकट  
दूर करतय च़ु म्याँनी

ॐ शब्द छख सर्व शक्तिमान  
महामाया च़ेय वनान  
काम क्रूद लूब बेयि अंदुकार  
बखत्यन छख च़ु कासान  
चॉनी बखुत्य शेवु शक्ती रूपु  
द्यान चोन दारॉनी  
क्षनुसुय मंज़ दूख तु संकट  
दूर करतय च़ु म्याँनी

मॉज बोज़तम छुय मे हाजथ  
अख बक्ती चॉनी  
गरि गरि रोज़तम मे सनम्वख  
हृदयस मंज़ बवॉनी  
सरस्वती हुंद प्रसाद युथ मे बनि  
नेर्यम अमृत वॉनी  
क्षनुसुय मंज़ दुख तु संकट  
दूर करतय च़ु म्यॉनी

★ ★ ★

## ३५. माँज लक्ष्मी आयि सोन सालु लोलो

माँज लक्ष्मी आयि सोन सालु लोलो  
कंद तु नाबद बरसय थालु लोलो  
लोलु पोशन करसय मालु लोलो  
कंद तु नाबद बरसय थालु लोलो

गटु च़ैज दूर गव मोह अंदकार  
तीज़ नोन द्राव छयतु गव नरकुन नार  
लोलु हृदयुक दीप अज़ बु ज़ालु लोलो  
कंद तु नाबद बरसय थालु लोलो

अज़ छि मावस गटु पछ बेयि बोमवार  
... .. ललवान पानु अँकार  
शायि शाये लोलुचि ग्रायि लोलो  
कंद तु नाबद बरसय थालु लोलो

गरु नावय कँर अज़ प्रथ काँसे  
दयि पूश्यतन शिव बाव पूर वाँसे  
लक्ष्मी नाथ त्रिज़गत पालु लोलो  
कंद तु नाबद बरसय थालु लोलो

स्वर्गु द्वार छु बन्योमुत अज़ आश्रम  
ब्रम च़ोल तय इंद्रिय गोमुत श्रम  
छिय च़े पूज़ान बँड्य तय बाल लोलो  
कंद तु नाबद बरसय थालु लोलो

आँतु रोस्तुय ज़ोतान काँत्याह दुप  
दीपमाला बावु छाव असलुक्य रुप  
न्याय चलि तय बेयि आय दायि लोलो  
कंद तु नाबद बरसय थालु लोलो

महा गनपथ गदि प्यठ क्याह छु सनिदान  
सेदि दाता असि टोठ सारिनय सान  
व्वलुबा ह्यथ सायं कालु लोलो  
कंद तु नाबद बरसय थालु लोलो

राम लक्षमन बेयि अज़ माँज सुता  
हलमत ह्यथ वापस आयि अयोध्या  
पोज़ प्रज़लान मंज़ बारगायि लोलो  
कंद तु नाबद बरसय थालु लोलो

पोश फवलुनस आयि अज़ बावुक्य पोश  
वेरि चाने च़ॉर्य दयि नावुक्य पोश  
पोशि मोत हय तिमन करि मालु लोलो  
कंद तु नाबद बरसय थालु लोलो

★ ★ ★

## ३६. रिंदु पोशि माल गिंदुने द्रायि लोलो

शूबि शाबाश चानि पोट छायि लोलो  
रिंदु पोशि माल गिंदुने द्रायि लोलो

राजु हाँज्यानि नाजु कया अँज्यनि गर्दन  
या इलॉही चेश्मु बदु निशि रछतन  
गछि कया कम चानि बारगाहि लोलो  
रिंदु पोशि माल गिंदुने द्रायि लोलो

कालु मोयस टाकॉन्य छय बरसर  
फँल्यलु नाफय मोलमुत मुश्कि अदफर  
हँजि पॉरान च्वंजु तय दायि लोलो  
रिंदु पोशि माल गिंदुने द्रायि लोलो

जॉल्य् वाँकन बाल येलि लागि शुमार  
पछ लगनस गँजरुनस लछ तय हज़ार  
तमि शायि नो म्वकलन पायि लोलो  
रिंदु पोशि माल गिंदुने द्रायि लोलो

रुवनि ग्वडुकुय यामथ बूजुम साज़  
साज़ बोज़ुनि आमुत राजु यँदराज़  
पोशि मालु छम पोशि तुल्य् डायि लोलो  
रिंदु पोशि माल गिंदुने द्रायि लोलो

हल्कु बंदु तॅल्य् शुबान नारे पिस्तान  
ती डीशिथ आशकन दिल लूबान  
वोल रोसुल मीर चाने मायि लोलो  
रिंदु पोशि माल गिंदुने द्रायि लोलो

★ ★ ★

# “shàmû rang”

A Collection of  
Marriage Songs and Leelas  
by

**Smt. Shamrani Raina**



(Internet Edition: M.K.Raina)  
05 April 2007

